

Dil dito, da Monturgi, a dì 22, ricevute a dì sopradito. Come trovò el reverendissimo Tornon, va al Papa: scrive coloqui hauti insieme, et li dete le lettere credentiali dicendo el cardinal de Medici legato fo retenuto in Germania, l'imperador se ha seusa col Papa, et el Papa li ha scritto torni da Soa Maestà. L'imperator vien in Italia, vol lassar in quella 16 milia fanti et Italia li pagi, la Signoria non so quello la farà, et disse el cardinal Agramonte veniva driedo et andava a Roma per esser a questo abocamento vol far Cesare con el Papa, et disse el re anglico fa querele dil Papa etc.

Dil dito, da San Maturin, a dì 23, ricevute a dì dito. Come li trovò el reverendissimo Agramonte et scrive coloqui hauti insieme, poi datoli le lettere di credenza, et disse la Signoria è amica dil re Christianissimo, et se da vui non mancherà sempre ve abazerà per grandissimi amici. L'imperator fa paxe et lianza et vol denari, el re Christianissimo ve ama et vol defendervi, nè vol nostri danari. Soa Maestà ha molti danari et ogni dì el ne acumula. Questi do reali così potenti è stretti de intelligentia, è bon haverli per amici, dicendo se il Papa farà qualcosa tuti do re venivano in Italia et a Roma, et non fa per vui che i vengano, con altre parole molto alte contra el Papa et contra lo imperador.

Da Paris, di sier Zuan Antonio Venier, orator, di 22, ricevute a dì dito. A dì 18 el Christianissimo partì de Chiantigli et loci de piacer et a li 20 zonse de qui. A dì 21 partì li do cardinali Tornon et Agramonte per Roma. Io visitai Agramonte, disse: l'imperator è stà mal conseià a lassar Germania non atendendo a cosa l'habbi promesso a quelli populi et a suo frateło qual non ha un scudo nè soldati per defension de Hongaria, a primavera venirà uno novo exercito, ha promesso el concilio et non lo fa, è in odio de tuti, va a Bologna, il re ha voluto far la parte soa con termini convenienti a l'honor suo, quando l'imperator non sarà, Soa Maestà anderà a una altra maniera. Il re non vol denari dal Papa nè da la Signoria, ave lassà pur Ravenna et Zervia, l'imperator vol Stado in Italia e tuò danari da tuti. L'imperator et suo frateło ha querele contro la Signoria, il re non vol el Stado di alcun nè volse mai danari, anzi ne ha servito; in Italia se tratarà far una liga contra dil re, et con monsignor di Tornon vano a la corte dil Papa, non contradirano, et hesendo necessitati consiglierano el meglio da amici dil re, et in Italia saremo testimoni de quello se dirà. Non se manda

alcun a l'imperator, questo re mandoe monsignor di Tenda in Provenza zoè el marchese di Tenda. Scrive el signor Theodoro Triulzi morite a Lion: secondo la promessa il re ha dato el governo de Lion al signor Pomponio Triulzi suo nepote, et fato mareschial de Franza monsignor de Obigni gentilomo scozese capitano de la guarda sua de scozesi; la compagnia de 80 homeni d'arme è rizecata da molti, se tien se dividerà in più parte over la anulerà, per esser molto facinorosa et in quella molti banditi de diversi Stadi de Italia. Sono in questa città congregati molti prelati de questo regno, ossia per decime o altro subsidio de danari, ma se dice non se tratarà questo fin el ritorno de cardinali da Roma, cussì disse a mi el reverendissimo Agramonte dicendo non manca al re provedersi, col suo clero secondo li andamenti dil Papa, de danari. Ho hauta lettere di 7 da Lion dil mio sucessor, l'aspeto con gran desiderio.

Di Paris, di sier Zuan Antonio Venier et sier Marin Justinian oratori, di 5 Decembrio, ricevute a dì 14 dito. A li 27 dil passato io Zuan Antonio ricevetti lettere di 14 con li avisi, i qual prima se hano hauti de qui a li do de questo. La sera gionse el re, a li 3 poi pranso fui da Soa Maestà, et li comunicai come per el conte Guido Rangon era stà richiesto a la Signoria nostra transito per la Cesarea Maestà et vituarie, et l'avisò dato de fanti amutinati et cussì se preparava el transito. Soa Maestà rispose son molto contento che la Signoria habbia honorato et acomodato l'imperator, io haria fato questo, io la laudo quanto posso, et replicò do volte. Poi disse: Ambasciator havea in animo de far dir a la Signoria per el mio ambassador, et vi dirò a vui, per l'amicitia et lianza ho con quella, aziò le scriviate: L'imperator è in Italia con grossa gente, non è bisogno di gente, vol congregar li principi de Italia in una volontà per obstar a le perturbation fusse fate in Italia et vol la pace, et questo se fa contra de mi, come se volesse tuor el Stado de Milan. Io non ho punto dissenso de simel cose, nè voio andar, nè audaremo, se prima non lo dirò a la Signoria Vostra. L'imperator sa che io non voio Stado in Italia, ma lui vol ben parte de quella, et li principi pagi le so zente, chi 4, chi 6 milia seudi al mexe. Scrivè a la Signoria per mio conto che la non entri in spesa; io non son per andar a Milan, vui italiani pagerè 12, o 14 mila fanti a lo imperador. Con altre parole. L'orator rispose el scriveria el tuto. Poi dimandò Sua Maestà fusse contenta dar audientia al novo orator venuto, disse

123*